

D e S t r o h w e d w e r - B a l l

---

E lostjet Speel  
fär värfriete on onvärfriete Mönsche ..

von

Peter Heydeck

"Wer lache wöll, de heer man to,  
ok Suertäpp, de moak öck froh."

Et hääbbe to spräke:

Fretz Oschlies, de Bur  
Dore, sien Fru  
Mieke, dr Schwäster  
Lieske, de Schwoagersche  
Sophie, de Fründ  
Dagott, Konnstopp, Noahwersch  
Fru Dagott, Frau Konnstopp

I.

Lieske on denn der Fretz

(Oppe Biehn ös de Deel von dat Buernhus to sehne, mette grote Dösch on e poar Stehl ööne Medd. E Träpp jeiht noah boawe. Oen eene Aeck steiht e scheenet Schaff, ööne andre e Bänk. Annem Balke hängt de Aerntekron. Dorche Där ös de Kech to sehne)

Lieske

(huckd oppe Bänk on streckd Stremp. Se singt vör söck hen):

Oeck ging ööne Goarde Lönnewand bleeke,  
oeck dochd, öck weer vörborge,  
doa keem mien allerlewster Schatz  
on bod mi e gode Morje.

Gode Morje bod he mi,  
öck wull em goar nich danke,  
ach mien allerscheenster Schatz  
feherschst du för Gedanke ?

Fretz

(kemmt rön)

Lieske

Na Fretzke, häst all bescheckt ? Wie jeiht Di ?

Fretz

Wie sull't goahne ? Koddrig on lostig ...

Lieske

Woso koddrig ? Oes Di wat äwer de Läwer gekroape  
Du böst joa bedripst wie de Oap, wenn he Nättle  
gefräte häwt.

Fretz

Ach wat, häwt söck wat met Oap ...

Lieske

Na kick moal, dat Koorn ös öngebrocht, de Schiene  
sönd vull, on Du moakst e Gesöcht wie säwe Doag  
Räjewedder !

Fretz

Heer man, Lieske, böst joa e kloke Marjell..

Lieske

Schwieg stell, Fretz, wenn dat Dien Fru to  
weete krecht ...

Fretz

Dat ös's joa eben -- mien Fru -- hied ös e ganz  
schwoarter Dag. Tie Joahr sönd wi hied vörfriet,  
on nu mott dat Wief geroade hied ööne Wält  
romkarjohle. Doa sull eenem nich de Gall äwer-  
renne !

Lieske

Na nu, quängel on kraksel man nich, Schwagager.  
Böst denn nich torreede met mi ?

Fretz

Joa, joa, 't ös woahr. Du packst to, dat öck mi wunner. Dat Meddag steiht oppe Dösch, wenn de Kl. twelf schleiht. De Emmers färre Schwien on färre Kälwer stoahne ön eene Reeje wie de Soldoate tum Appäll. De Höhner kreeje ehr Fräte. De kleene Marjellkes, dat Riekche on dat Bärthche, ware ok nich värjäte. De Jung, de Kardel, krecht, wat em tokemmt. Odder Fru ös Fru. On geroade hied fählt se mi, hied am Hochtiedsdag. Man mehd doch wem tum Karesseere hätte wölle.

Lieske

(e bät ärgerlich)

Na nu odder genug ! Häwt Dien Fru dat nich värdeent ön all de Oarbeitsjoahr, dat se ok moal rutkemmt ? Moal wat andersch heerd als Dien Gekarmel ? Frues motte ok weete, wat de nie Tied von ons wöll. Oem Lehrgang färre Demokratie heer se dagäwer veel Värnönftjet, wat se good bruke kann. Doa belehrt se söck, dat de Mönsch noch wa andersch done kann wie Schwien fuddre on Kähj melke. Nich, dat öck dat värachd, odder man mott ok to weete kreeje, wat bute los ös ... Häst Du nich sölwst gesächt, mien Fru, de Dore, sull tum Lehrgang hen ?

(Wenn de Lieske rädt, streckd se ömmer doller, dat de Noadle man so fleeje)

Fretz

(betuscheld ehr)

Rähj Di man nich op, Lieske ... Häddst sulle Professor stodeere bi so'n Mulwark ... Joa, joa, dat stömmd, öck häbb se foahre loate. Man blossig, öck värjät dem Hochtiedsdag. Oeck jenn ehr joa alles, odder öck sie ok man e Mönsch ...

Lieske

Doa böst wat Rächts. Na wacht man e bätke. Joa, Strohwedwer böst an Dienem Hochtiedsdag, on Di ös so mulmig to Mod, wiel Di de Gesällschaft fählt. Doafär ös gesorgt. Hiede oawend koame doc de Frues to mi. Wi wolle Strep ströcke färre utjebombte Kinner vonne Flichtlinge, on de Männe ware woll ok hinterher koame. Dem Konnetopp sien Koh ös krank, on de Dagott wull Di wat wejen de Steiere froaje.

Fretz

Ganz god, ganz god. Odder dat ös mi nich genug. Am Hochtiedsdag mott et e bätke lostig togoahne.

Lieske

Doa häst önt Schwoarte getroffe. Odder wat sull wi .... Wat kicksd mi so an ?

Fretz

Wat kicksd Du mi so an ?

Lieske

Nu kicke wi ons alle beide an ....

Fretz

Mi föllt wat ön ....

Lieske

Mi ok , , , ,



Fretz Kann sönd, wi meene datsölwje ..

Lieske Na sägg .....

Fretz Nei, sägg Du ....

Lieske Wenn wi ....

Fretz Wenn wi hier ....

Lieske Joa, hier bi ons ....

Fretz E Strohwerball ....

Lieske Feiere machde ...

Fretz Joa, hiede oawend ... Lieske ... loat Di omoarme. Nu, ös mi all ganz andersch to Mod ....

Lieske (wehrd em af)  
Man ömmer sachte mette junge Peerd ....

Fretz Odder ward de Dore nich gluhpsch kicke, wenn se von onserm "Ball" heerd ?

Lieske Achwo, de lacht söck em Ast an, wenn wi ehr dem Spoass värtälle.

Fretz On war gäv wi to äte ?

Lieske Väl sull't nich koste ... Dat Bäste ös de Spoass doabi.

Fretz De Dore hält ömmer dem Dume oppe Gildbüdel.

Lieske Oeck dänk so: Schwienbroade on Lägerworscht kann jeder jäwe, Koke ok; on doafär ös all de Tied to kort. Weetst wat ? Öck back Kartoffelflinse vonne fresche Kartoffle.

Fretz Dat do, Lieske .... on wat sull wi drinke ?

Lieske Grog ös nich ömmer needig fär ju Mannslüd. Oeck moak Hömbeersaft heet. Doa kann söck keiner besupe..... Goah Di man antehne, Fretzke. Et ös Tied. Moak Di fein. Oeck fang mitte Flinse an.

(Fretz jeiht af, he piept e lostjet Leedke).

Lieske, Mieke, Sophie

(Et kloppt anne Där. Mieke, dem Fretz siene Schwäster kemmt rön, on Sophie, ehre Fründ)

Lieske Mieke, Sophie, ju koame wie gerope. Hied ward et. bi ons wat to danze jäwe.

Mieke Dat häbb öck mi all lang gewönscht. Odder wie kömmt dat ?

Lieske Nich vül froage ! Dat's e ganz utgefallne Sach. Hied ös dat tiejährike Hochtiedsfäst vom Fretz on de Dore. Doa wöll wi e bätke feiere.

Sophie Wat ? Ohne Fru ?

Lieske Joa, ok ohne Fru. De Dore ward nich schömpe.

Mieke Na denn man lostig.

Sophie Doa war öck mi god de Schohsoale önschmeere !

Lieske Fär nuscht ös nuscht. Hälpe mott ju ok. De Jäst sönd bol doa. Du, Sophie, goah noah de Kech, wi backe Flinse. Schroap de Kartoffle, ok glik riewe, joa ? On strämm Di, de Seejer ös all söss. Mieke, wi moake de Deel paroad.

Mieke Mott de grote Dösch utgetoage ware ?

Lieske Joa, joa, man ömmer fix !

Mieke On wiewäl Stehl ran ?

Lieske Na so Stöcker söss odder säwe ... Denn nemm dem witte Damastdook on spread em oppe Dösch. Et licht öm Schaff.

Mieke E scheenet Dook, witt wie Schmand.

Lieske De Holzleichter war wi ok opställe met frische Lichter, dat's so feierlich.

Mieke Sull öck nich Bloomkes önnne Voas stäcke ?

Lieske Nei, de Astre sönd all verfroare. Nemm e Strutz Danne met Strohblome. Denn ok wat Greenet anne Wänd, on vörjät nich dem Stohl färrem Ehemann to bekränze. De Bloome hänge önt Husflur anne Träpp.

(Mieke hoalt de Danne on de Strohblome ...  
Lieske jeiht noah de Där vonne Kech)

Lieske

Sophie, oppe Regoal steiht e grote Buddel met Hömbeersaft. Dem war wi met heete Woater värmänge. Dat schmäckt tum Tungafäche on schmett keinem om. Doa kannst Di biem bäste Wölle nicht besupe.

(Mieke bringt Danne on Bloome. Se stäcke se önn Voas, hänge Danne anne Wänd on putze ok dem Stool ut. Se singe e Leedke:

"Lott ös dot, Lott ös doot,  
Lieske licht öm Stoarwe.  
Dat ös god, dat ös god,  
Wöll wi ehr beoarwe.

Ent, zwee, dree, veer - Lieske, goah tum Keller hen on hoal mi e Glas Beer.  
Fief, söss, säwe, acht, - de Mudder leschd de Lampe ut on secht mit gode Nacht."

De Värige, de Fretz

Fretz

(Kämmt ute Alkov)

Mieke

Härrjeh, doa ös joa de Fretz ! Mönsch, wat häst Du Di fein gemoakt ! Dem Broaderock häwt he söck angetoage, wie doamoals als Brüdgam.

Lieske

Nu kick di moal eens an ! En tie Joahr häst Di all so wat wie e lütte Buuk angemäst. De Broaderock däckd em nich mehr ganz. Odder de Storchschoabel önt Knoploch rett alles wedder rut.

Mieke

Fretz, nu teh moal de Schlorre ut.

Fretz

Wenn öck keine Lackstäwel häbb ...

Mieke

Wacht, öck putz Diene Sünndagschen äwer. Du beschmeerst Di noch dem Broaderock met Wichs.

(Se geiht noah de Kech on putzd fix de Stäwel äwer)

Fretz

On wie ös dat met dat Äte ? Oes dat all em Lot ?

(He kickd önn Kech)

Frues, nun sönd odder genug Kartoffle geräwe.  
Wenn wi de Flinse runnerkreeje, deit ons de Buk weh. Dat's doch färre ganze Schwadron !

(Lieske titt em anne Scheesseskes torück).

Lieske

Goah, goah on schabber nich. Wi bruke keine Toppkicker. Teh Di dem eene Stäwel an, de ös all blank.

Mieke

Oeck sie all färtig.

(Se bringt dem andre Stäwel noch de Deel)

Na nu sie öck tofreede met Di ... So kannst oppe Bal goahne. Mi rändd all de Schwetz, dat ös man so kläckerd.



- Sophie (Kemmd ute Kech gelope)  
On öck mott lache.
- Mieke (Bossig)  
Wat ? Lache ? Äwer mi ? Äwer mien Afmarache ?
- Sophie (wöll söck utschitte vör Lache)  
Lüd, so es Spoass ös mi noch nicht väргеkoame !
- Mieke Heer op ! Öck weet nich, wat doa to Lache ös !
- Sophie Dräll Di om, odder värfier Di nich.
- Mieke Lieske, Fretz ! E Stool ! Oeck beschwiem !  
Oeck fall om ! ... Dore, Du ? Böst et,  
böst et nich ? Mettem Kuffert on mettem  
Schörm ? Oeck denk, Du böst op dienem Lehrgang ?

4.

De Värige, on Dore

- Dore (Steiht öinne Där vonne Deel, se häwt dem Mantel an,  
ön eene Hand dem Kuffert, öinne andre dem Schörm)
- Fretz (Packt ehr omme Hals on dreckd ehr an siene  
Brost, Lieske droht ehr mette Fust)
- Alle (dorchenanner)  
Wie keem dat ?  
Wo kemmt Du her ?  
Wat ös met Di ?
- Dore Na, Lüd, Kinner, doa sie öck. Wat sägg ju darto  
De Lehrgang weer eher to Änd. Wat sull öck doa  
noch länger bliewe ? Oeck huckd mi oppe Iserboak  
on fohr to Hus.
- Lieske Oes e scheene Bescherung ! Meenst, de Fretz  
lett Di noch moal op Reise goahne ?
- Dore: Na nu sakereert man nich so doll ! Oeck dochd  
so: An mienem Hochtiedsdag nich tohus sönd,  
nich bi mien Fretzke, on de Kinder, on bi de  
Höhner, on der kleene Farkelkes ...  
On keinem hätte tum Afknutsche ...
- Fretz Dat sägg öck ok. Hier, Dore, häst noch e Butsch,  
so söt wie vonne Brüdgam .... Dat schmäckt ...  
Ohne Di ös dat nuscht. Noch eenmoal loat öck  
Di nicht wäch.
- Dore Oeck sägg ok: Tohus ös tohus !  
(Se huckd söck hen)

Fretz Binoah hadd öck mi oppe Strohwedwerball ne andre togelecht.

Dore (steiht op)  
Nanu ! Wat's dat ?

Fretz Na kick e moal. Du weerscht doch nich doa, on öck piepstrurig. Doa säd de Lieske, on öck säd ok, dat wi doch dem Hochtiedsdag feiere motte. On doa wull wi mette Noahwersch lostig sönd bi e bätke Äte on Drinke on Danze. Oes Di dat towedder, Dore. sull wie se afbeställe ?

Dore Odder nei ! Loat se man koame !

Fretz Kinder, Oeck west dat ! Wi sägge keinem, dat Du torück böst, Dore. Du värsteckst Di. Dat gewt e Mordsspoass ! Oeck wull sowieso e feine Räd vom Stoapel loate, ok miene Jäst wat värläse.

Dore Dat so man, Fretzke, dat's Diene Forsch. On wat wöllst läse ?

Fretz Oeck fund so ne spoassige Geschöcht von eenem, wo söck Wilhelm Busch nännt. Nu pass moal op, Dore. Wenn öck de Ställ läs: "Heissa, so ruft Sauerbrot, heissa, meine Frau ist tot !" Denn kemmt Du Dore, haste nich gesehn, vom boawe de Träpp runder. Doa woare onse Jäst dat Mul opmoake on värjäte, et wädde totomoake.

Dore Fretzke, oeck moak met. Wenn wo wat tum Lache jewt, doa sägg ich nich nei.

Mieke Dat's e Baggahsch ! De bedreeje dem Diewel on sien Großke darto - Wat wöllst denn antehne, Dore

Dore Oeck teh mit dem ole Schwartsiedne vonne Tante Karlien an, mette Krinolien on mette Puffärmel. De Schnut besteewer öck mi met Mehl on dräll mit de Hoar oppe Kopp öne Dutt tosamme. ... Bringt mi odder noaher e Schättel met Flinse rop, dat mi de Tied nich lang war, on dat öck nich värhunger-.

(Se geht noah boawe)



5.

De Värige, ohne Dore, Fru Konnetopp, Fru Dagott

(Noah e kleenet Wielke klopp et)

Lieske Man god, dat se boawe ös. Se koame all.  
Nu sied moal alle stell.

Fru Konnetopp (kemmt rön; so ös so lang wie de Wäke von Ostre  
bet Pingste on sitt ömmer ed bät suertäppsch ut)  
Härrjeh, dat blänkerd joa man so hiede owend.  
Oeck dänk, öck sie tum Ströcke gekoame, --  
nu froag öck, ös hied Begräfnis odder Hochtied ?

Lieske Hochtied, Hochtied ! Fru Konnetopp !  
De Hochtiedsdag vom Fretz on vonne Dore ...

Fru Konnetopp (stämmt de Oarm öinne Sied)  
Ju wölle feiere, on de Dore ös nich tohus ?  
Scheckt söck dat ?

Fretz Wellkomm, wellkomm, miene läwe Fru Konnetopp.  
Alle Doag woare Se hibscher met Ehre 60 Joahr. -  
Schömpe Se man nich, on hucke Se söck hen.  
Tum Ströcke koame Se noch ömmer freh genug.

Fru Dagott (kemmt rön; se ös kort on dick geroad  
on e bät ängbrostig)  
Go'n Qawend alltosamme.  
(Se pust on pust)  
Lied, öck soe ganz ute Pust gekoame. Ös dat  
e Storm ! De Reck floage mi äwre Kopp.

Fretz Go'n Qawend, Fru Dagott. Oemer kräjel ?  
Wie de Jingste !

Fru Dagott Hoale Se an ! Se wölle mi woll uze. Fründke ?  
(Se packd ehr Strecktüg ut)  
Ös dat hier gemietlich. Bute weer't ganz  
schubbrig... Hätte Se söck för ons so fein  
gemoakt, Oschlies ?

Fretz Natierlich ! Fär wem denn sonst ? ...  
Koame de Männer nich ?

Fru Dagott So sönd glik doa. Mien Oler funk dem  
linke Hanschke nich.

Fru Konnetopp On miener wull noch noah de kranke Koh sehne.

Fretz Ös se nich all bäter ?

Fru Konnetopp Bäter ? So wöll nich opstoahne. Mien Oler wull  
Se froage, ob Se nich e Medizin fär ehr hätte ?

6.

De Vöriige, de Konnetopp, de Dagott

(De Männer koame angestolpert. Se scheddle dem Fretz on der Marjelles de Händ)

- Fretz Go'n Oawend. Noahwer Dagott, go'n Oawend, Konnetopp. Nu huckd ju moal erscht hen. Dat's rächt, dat ju gekoame sönd.
- Konnetopp Oeck wull erscht nich. So mang de Frues ös dat nuscht.
- Fru Konnekopp Nemm Di ön acht. Oeck pass op !
- Dagott On wer passt oppe Fretz op ? De Kujohn ! Lätt sien Fru op Reise goahne on wöll söck met junge Mäkes verameseere ! Dat loat öck mi gefalle.
- Fretz Mönsch, wi feiere hiede mienem Hochtiedsdag. Oeck mott mi doch treeste, wenn mien Fru nich doa ös. Wer kemmt an miene greene Sied ?
- Konnetopp Na, de Junge on Hibsche ....
- Fretz Sophie, man ömmer driest !
- Dagott De Katz ös nich tohus, de Mies danze äwer Dösch on Bänk ...  
Böst doch e kreetscher Keerl, Fretz.
- Konnetopp On so utgefeint häwt he söck. Schloag man nich äwer de Sträng, Oschlies !  
(Fru Dagott on Fru Konnetopp bresle tosamme)
- Fru Dagott Warraftig, he lächt de Oarms om de Marjelles on scheneert söck nich moal.
- Fru Konnetopp Nu puscheit he se schon.
- Fru Dagott On wie he se ankickd. De Oge quelle em foorts rut ute Kopp
- Fretz Lieske, bring de Flinse on dem Hömbeersaft !  
(Lieske ställd e Schättel met Flinse oppe Dösch)
- Lieske Go'n Apptit !  
Mieke bröngt dem Hömbeersaft on de Gläser)
- Fretz Noawersch, Pastete häbb wi nich. Odder, doa ös wat färrem Hunger on färrem Därscht. Nu haut rön ! Odder döchtig.
- Dagott Oeck woar mi nich needige laote.



- Fru Dagott Dat's doch moal wat andersch.  
Knusprig sönd se.
- Fru Konnetopp Seer scheen !
- Dagott Wenn mi dat Äte so god bi Di schmäckt  
wie hiede oawend, Fretz, denn mott öck  
ömmmer an dien Hochtiedsfäst vör tie Joahr  
dänke. Weetst noch, wat wi doa fär Spoass hadde
- Fretz Joa, öck weet.
- Fru Konnetopp De Dore weer e godet Mäke, flietig öinne  
Wörtschaft, odder wenn se Floade backt, on  
so backt ömmmer so Stecker twelf, on se brukt  
noch wo e Bläch, denn schöckt se öinne Noahwer-  
schaft rom, on wenn et heet "afjäwe", denn  
sächt se: "Luer man drup !" On da hadd wi  
bi de Hochtied e Vörsch op ehr gemoakd,  
de weer so: "Härrjeh, wo ös mien Kokebläch ?  
Et weer mi all twee Joahre wäch."  
(Se lache alle)
- Dore (Schmeet von boawe met Bonbons runner)
- Fru Konnetopp Wer schmett doa vonne Träpp met Bonbons ?
- Frau Dagott Joa, öck kreej ok all eenem ön't Genöck.
- Dagott On öck oppe Deetz !
- Fretz (Kickd noah boawe)  
Wart ju woll dat bliewe loate, je kleenet  
Kroptüg, Rieke on Bärthche ... goahd ligge ....
- Konnetopp On denn hadd de Dore ömmmer dem Kopp voll  
Wippkes. Eenem Soamer hadd wi dree od vör  
Wäke dreejet Wädder. De Hömmel blau on kein  
Räjen. De Wäre wie e Deel, dat Koorn vör-  
dreejt. On eene Nacht -- öck weer öinne erschte  
Schloap --- doa bullerd wat anne Fönster.  
Oeck öinne Höcht, stäckd dem Licht an on kickd  
noah dem Seejer: Halw twelf ! On schreej:  
"Sönd doa Reibersch ? Oder wo brännnd dat ?"  
Doa heer öck de Dore ehre Stemm: "Nei, nei,  
Noahwer, et brännnd nich. Oeck wull Enne bloß  
sägge: . Et räjent !"  
(Se juchze alle on lache)
- Frau Dagott Joa, joa, de Dore weer es strammert Mäke,  
on se ös e staatsche Fru ... man schoad ...  
schoad ...  
(Se briseld wädder mette Fru Konnetopp)



Fru Konnetopp Nu drinkd de Fretz all mette Sophie ut eenem Gla

Fru Dagott Dat's binoah nich mehr Spoass, nich antosehne ös dat.

Fru Konnetopp Wenn he hiede so ös noah tie Joahr, wie ward datt sönd, wenn he twintig Joahr värfriet ös ?

Frau Dagott Telegrafeere mottst, dat sien Frau gliek torick kemmt. Wenn de dat wußd, kein ruhje Stund hadd se mehr.

Fru Konnetopp Doa kreej öck all wäddeer eenem Bonbon oppe Kopp. - Wer schmeett doa von boawe ?

Dagott Sönd Se moal stöll ! Se ware vonne Bonbon kein Loch öm Kopp kreeje ...  
Nu heerd man wieder .... On bi de Hochtied, dat war öck nich värjäte, wie de Härr Farrer noch biem Kaffee gerädt hadd, on wie he värtälld von siene Eh, dat he söck keinmoal met sien Fru gesträde häwt; on wenn he märkd, dat so wat öne Loft weer, on dat se em met Wäddeerweerd koame wull, denn säd he man:  
Du häst rächt ! On dat neechste Moal ok:  
Du häst rächt ! On wenn se em denn froagwies ankickd on säd: Ömmer kann öck doch nicht rächt hälle ? ... denn säd he: Nu häst Du wäddeer recht !

(Se schreie vor Väragnäje)

Konnetopp Mi schiend, de Fretz wöll ok wat värtälle

Fretz Na Noahwersch, woarum sull öck hied nich ok e Räd vom Stoapel loate ? Op hochdietsch, versteiht söck. On disem Dag schöckd söck dat so.

(He reisperd söck on besönd söck e bätke)

"Wir sind hier drei Ehemänner, und wir sind gute Ehemänner ..."

Fru Dagott on Fru Konnetopp

Heerd em, Na, na, ös dat ok woahr ?

Fretz Wir haben die Frauen neetig wie ein Stickchen Brot. Und wenn einer dänken mecht, er kennt ohne Frau sein, denn irrt er sich; denn mecht es ihm gehn wie dem Mann, von dem ich gelesen hab. Ich bracht mir aus der Stadt so e spaßge Geschicht mit. Da steht von einem gewissen Sauerbrot, der fier seine Schächtigkeit gegen seine Frau gestraft wurde. Ich werd man die Ställ vorlesen:

Da war einer, den er kannte,  
der sich Sauerbrot benannte.  
Sauerbrot, der fröhlich lacht,  
hat sich einen Punsch gemacht.  
"Heissa!" ruft Sauerbrot,  
"Heissa, meine Frau ist tot!  
Heute stört sie uns nicht mehr,  
Also Alter, setz dich her,  
nimm das Glas und stoße an,  
werde niemals Ehemann. "

Knarr, da öffnet sich die Tür, wehe,  
wer tritt da herfür ?

Dore (kemmt langsam die Träpp runner. Se häwt de Oge  
wie opgeräte, der Händ värgestrackd, on hölt  
dat Kriez ganz stief, als wenn se e Äll ver-  
schlucks häwt)

Fru Dagott (sackd to samm)  
Lüd ! Hol mi, hol mi fast ! Oeck starw !  
Doa kemmd de Dore de Träpp runner. Witt  
wie Kalk, öñne schwuarte Kledahsch ! Lüd !  
E Gespäñst ! Se mäldt söck an !

Konnetopp Fix ! Fix ! Jewtehr e Schnaps ! Lohft !  
Lohft ! Häwt ju e Konjak önt Hus ?  
De Näs ward ehr all ganz spetz.  
(Mieke rännd noah de Konjakflasch)

Fru Konnetopp On doa licht ok de Fretz mette Kopp öñne  
Sophie ehr Schot. Dat kann em stoarke  
Mann omschmiete.

(Fru Dagott drinkt e Schnaps. Se richt söck  
öñne Höcht)

Dagott De Fretz ös ok beschwiemt. Wach op, Fretz  
Jewt em ok e Konjak.

(De Fretz bliwt ligge)

Dore Moakt kein Klamauk, Noahwersch ! Oeck sie  
et wirklich. Kickd mi an. Fleesch on Blod.  
Kein Ruh hadd öck öñne Främd. Oeck mußd  
schnäll koame.

Fru Konnetopp Oschlies, moake Se de Oge op. Et ös kein  
Gespäñst. De Dore ös terück vom Lehrgang.  
Ganz oppe Flutz ös se gekoame.

Fretz (Noch ön halwe Beschwiemnis)  
Nei, Dore, ok sowat. Joa, se ös et. Wat ok  
aller jewet ! Oeck sie noch ganz beduselt.  
Du kemst wie de Su önt Judehus ! Oeck hädd  
vär Schräck dem Dot hääbe könne.

Konnetopp Fretz, Fretzke, doa häst odder got angefährt.  
De Fru huckd boawe oppe Träpp, on der Mann  
moakt So'ne Zatzkes !

Fretz (richt söck önnne Höcht)  
Oeck weet noch nich, wer sich angefährt häwd !

Fru Konnetopp Woso ?

Dagott Wat meent he ?

Konnetopp Wie sull öck dat värstoahne ?

Fretz Na meent ju, öck häbb nich gewußd, dat de Dore  
doa boawe huckd on ju met Bonbons oppe Kopp  
schmett ?

Dore Joa, joa, he kann god, de reine Uhlespiegel !  
Odder öck sie Di nich bees, Fretzke, böst  
mien trutstet Mannke.

Fretz On Du mien sötet Wiefke !  
(He lecht de Oarm om ehr Schuller)

Konnetopp Oeck terbräk Di de Knoake, Fretz; öck schloag  
Di to Mos ! So e Kreet ! So e Lorbass ! So e --  
mi so önnne Fichte to fehre !

Fretz Ach wat, Noahwer, Spoass mot sönd ....  
Schmiet dem Dösch ute Deel. Wi wölle danze. ...

Dagott Na wälkem ?

Fretz Oeck dänk, wiel dat hiede oawend so ge-  
mietlich ös:  
  
Lott ös dot, Lott ös dot,  
Lieske licht öm Stoarwe.  
Dat ös god, dat ös god,  
wöll wi ehr beoarwe.  
Eent, twee, drie, veer -  
Lieske, goah tum Keller hen  
on hoal mi e Glas Beer.  
Fiew. söss, säwe, acht,  
de Mudder löscht de Lampe ut  
on secht mi "gode Nacht" !